

કલોસ્સી મંડળીલ પાઉલ પ્રેષિતનો લોખલાં પત્ર પ્રસ્તાવના

પાઉલે કલોસ્સીમાય મંડળીલ જુઠા ગુરુવાહા વિરોધ મજબુત કોઅરાહાટી પત્ર લોખ્યાં, જ્યે કેવળ ખાઅના એને પિઅના એને ધાર્મિક તેહેવારા બારામાય નિયમ લાગુ કોઅરા કોશિશ કોઅતે આર્તે, પાઉલ બોદા માઅહાનુ દર્શનશાસ્ત્ર એને પરંપરાહાવોય ખ્રિસ્તા શ્રેષ્ઠતાયેલ દર્શાવેહે. તે ખ્રિસ્તા ઈશ્વરતા બારામાય લોખતાહાવ (“અ્યા અદૃશ્ય પોરમેહેરા છાપ હેય, જી બોદયે સૃષ્ટિ પેલ્લા હેય”) (1: 15) એને અ્યાય પોતાના લોયાથી મેળ-મિળાપ સ્થાપિત કોઅયા. તો સ્પષ્ટ કોઅહે કા યા દુનિયામાય રોઅના હાઅ્યો તરીકો સંસારિક વાનહા કોઅતા હોરગા વાતેહેવોય દિયાન દેઅના હેય. પોરમેહેરા નિવાડલા લોકહાન પોતાના પાપી જીવનાલ પાછલા છોડા જોજે એને યોક ન્યાયી રીતેકેન જીવા જોજે, ખ્રિસ્તાલ મંડળી ટોલપા હારાકા એઅરા જોજે (1: 18) પાઉલે યાલ જેલેમાય રોઅન લોખ્યાં, ઓઅય હોકે અ્યા સમયા પાછે જોવે અ્યાય કલોસ્સીયાહાલ લોખલાં આતા.

સલામ

¹ આંય પાઉલ, ઈ પત્ર લોખતાહાવ, જ્યા પોરમેહેરાય પોતાના ઇચ્છાકોય ઈસુ ખ્રિસ્તા પ્રેષિત ઓઅરાહાટી નિવડી લેદો, એને આમહે હાંગાત્યો વિસ્વાસી તિમોથીઇહીને પત્ર,

² ખ્રિસ્તામાય અ્યા પવિત્ર એને બોરહાવાળા વિસ્વાસી બાહહાન જ્યા કલોસ્સી શેહરામાય રોતહા, આમહે પોરમેહેર આબહો તુમહાન સદા મોયા એને શાંતી દેતો રોય.

ધન્યવાદ

³ જોવે આમા તુમહેહાટી પ્રાર્થના કોઅજેહે, તોવે આમા પ્રભુ ઈસુ ખ્રિસ્તા આબહો એટલે પોરમેહેરા ધન્યવાદ કોઅજેહે.

⁴ કાહાકા આમા વોનાયાહા, કા ઈસુ ખ્રિસ્તાવોય તુમહે બોરહો હેય, એને બોદા પોરમેહેરા પવિત્ર લોકહાવોય તુમા પ્રેમ કોઅતાહા.

5 તુમા એહેકેન ચ્યે આશા લીદે કોઅતેહે, જીં હોરગામાય તુમહેહાટી થોવલાં હેય, તુમા પેલ્લાથીજ ચ્યા બારામાય વોનાલે હેય, જોવે પેલ્લાદા લોક તુમહાપાય ચેના એને તુમહાન ખ્રિસ્તા બારામાય હારી ખોબાર આખી, જો પોરમેહેરા હાચ્યો સંદેશ હેય.

6 જેહેકોય બોદી દુનિયામાય ઈ હારી ખોબાર ફેલાય રિઅલી હેય એને બોજ લોક વિસ્વાસી બોની રીઅલા હેય, તેહેકોયનુજ તુમહે વોચમાય ઓઅતા ચેય રીયલા હેય જ્યા દિહ્યાથી તુમાહાય ચાલ વોનાયા એને પોરમેહેરા સદા મોયા હાચ્યાઇ પુરી રીતેકોય હોમજી ગીયા.

7 તુમહાન આમહે હાંગાત્યો સેવક ઇપફ્રાસ પાઅને ચા શિક્ષણ મિળ્યહા, ઇપફ્રાસ તુમહે ફાયદાહાટી ખ્રિસ્તા વિસ્વાસી સેવક હેય.

8 ચ્યાય આમહાન બિજા લોકહાવોય તુમહે પ્રેમા બારામાય આખલા હેય જીં પવિત્ર આત્માય તુમહાન દેનલા હેય.

આત્મિક ઉન્નતિહાટી પ્રાર્થના

9 ચાહાટી જ્યે દિહી આમા ઈ વોનાયા, આમા કાયામ તુમહેહાટી પ્રાર્થના કોઅતા રોજહે, આમા પોરમેહેરાલ ઓહડી વિનાંતી કોઅજેહે કા પોરમેહેરા આત્મા તુમહાન જ્ઞાન એને હોમાજ દેય, જ્યાકોય તુમા પોરમેહેરા ઇચ્છા પુરી રીતીકોય હોમજી હોકે.

10 ચાહાટી તુમા એહેકેન જીવન જીવા જેહેકેન પ્રભુ લોકહાન જીવા જોજે, એને તુમા બોદી રીતેકોય પ્રભુલ પ્રસન્ન કોઆ. એને તુમા કાયામ બોદે રીતેકોય હારે કામે કોઆ, એને કાયામ પોરમેહેરાબારામાય વોદારી એને વોદારી જાંઅતે જાં.

11 આંય પ્રાર્થના કોઅતાહાંવ કા પોરમેહેર ચ્યા મહિમામય શક્તિ વાપર કોઇન તુમહાન બોજ મજબુત બોનાવે, કા તુમા ધીરજથી એને આનંદથી તુમહે દુઃખ સહન કોઇ હોકે.

12 એને પોરમેહેર આબહાલ ધન્યવાદ દેતે રા, કાહાકા ચ્યાય તુમહાન ચે લાયકે બોનાવ્યાં કા તુમા હોરગા રાજ્યમાય રોનારા પવિત્ર લોકહાઆરે વારસા સહભાગી બોને.

13 કાહાકા ચ્યાય આપહાન સૈતાના તાબામાઅને છોડાવ્યા એને ચ્યા પ્રિય પાહા રાજ્યામાય લેય ચેનો.

14 જ્યા બલિદાના લોયાકોય પોરમેહેરાથી છુટકા એટલે આપહાન પાપહા માફી મિળલી હેય.

ખ્રિસ્તા જીવન એને કામે

15 આપા પોરમેહેરાલ નાંય દેખી હોકજે, બાકી જોવે ચ્યા પોહો, ઈસુ ખ્રિસ્ત, યોક માઅહું બોનીન ચેનો, તે ચ્યાય આપહાન હોમજાડ્યા કા પોરમેહેર કોહડો હેય, કાહાકા ખ્રિસ્ત બિલકુલ પોરમેહેરા હારકો હેય. પોરમેહેરાય જું કાય બોનાવ્યાં ચ્યા પેલ્લા ખ્રિસ્ત હેય, એને બોદી બોનાવલી વસ્તુહુવોય ચ્યા ઓદિકાર હેય.

16 કાહાકા ઓ તોજ ખ્રિસ્ત હેય જ્યાંય બોધો વસ્તુહુલ બોનાડાહાટી પોરમેહેરાઆરે કામ કોઅલા હેય, હોરગા કા દોરત્યે, દેખાનાર્યો કા નાંય દેખાનાર્યો, રાજ્યાસન કા શાસન, સત્તા કા ઓદિકાર, બોદા ચ્યાકોય એને ચ્યા સેવા કોઅરાહાટી બોનાવલા હેય.

17 બોદા બોનાવલા જાં પેલ્લા ખ્રિસ્ત હેય, એને બોધો વસ્તુ ચ્યામાય હારેરીતે બોની રિઅલ્યો હેય.

18 તો તોજ હેય જો મંડળીહે વોય ઓદિકાર કોઅહે, જું ચ્યા શરીર હેય, તોજ પેલ્લો હેય, એને મોઅલાહામાઅને તોજ પેલ્લો જીવતો ઉઠયો, યાહાટી તો બોદી વાતહેમાય મહાન હેય.

19 કાહાકા પોરમેહેર આબહા પ્રસન્નતા ઈ વાત યામાયજ હેય કા, પોરમેહેરા પુરો સ્વભાવ ખ્રિસ્તામાય રોય.

20 પોરમેહેરાય ચ્યા પોહાલ દોરતીવોય દોવાડના નિર્ણય કોઅયો, એને ચ્યાય લોય પાડ્યા એને તો હુળીખાંબાવોય મોઅઇ ગીયો. પોરમેહેરાય ઈ પોતા એને ચ્યે બોદી વાતહે વોયમાય મેળમિલાપ બોનાડાહાટી કોઅયા, એહેકેન ચ્યે પોતા એને બોદહા વોયમાય મેળ-મિળાપ બોનાડ્યા જું હોરગામાય એને દોરતીવોય હેય.

21 તુમા તુમહે ખારાબ કામહા લીદે પોરમેહેરાઇહીને દુઉ ઓઓય ગીઅલે આર્તે એને તુમહે મોનાકોય તુમા દુશ્માન આર્તે.

22 બાકી પોરમેહેરાય આમી ખ્રિસ્તાલ માઅહું બોનાડીન એને ચ્યા હુળીખાંબાવોય મોરણાકોય મેળમિલાપ બોનાડ્યા, જ્યાકોય તો તુમહાન પવિત્ર, દોષવોગાર એને બુલવોગાર બોનાડીન પોરમેહેરા હામ્મે ઉબે કોઅે.

23 બાકી તુમહે ખ્રિસ્તાવોય મજબુત બોરહો જોજે, તુમહાન હારી ખોબાર આખતે વેળાયે જું આશા મિળલી આતી તી નાંય છોડતે, જું હારી ખોબાર આકાશા નિચે બોદી દુનિયામાય આખલી જાહે, તી હારી ખોબાર આંય પાઉલ પ્રચાર કોઅતાહાંવ.

મંડળીહાટી મેઅનાત

24 આમી આંય તુમહેહાટી જું દુઃખ બોગવી રોયહો, ચ્યા લીદે આંય ખુશ હેતાઉ, એને આંય સાદા મા શરીરામાય દુઃખ સહન કોઅતાહાંવ જેહેકેન ખ્રિસ્તાય ચ્યા શરીરાહાટી એટલે મંડળીહાટી સહન કોઅયા.

25 પોરમેહેરાય ચ્યા સંદેશ તુમહાન પુરીરીતે હોમજાહાટી માન નિવાડલો હેય, યાહાટી આંય મંડળી સેવાક બોની ગીયહો.

26 જો મર્મ વિતી ગીઅલા કાળ એને બોદી પીડી લોકહાપાઅને ગુપ્ત આતો, બાકી આમી પોરમેહેરાય ચ્યા પવિત્ર લોકહાવોય પ્રગટ કોઅય દેનલો હેય.

27 કાહાકા પોરમેહેરા ઇચ્છા આતી કા ચ્યા લોક ઈ જાંઆય લેય કા ખ્રિસ્તા મિલકાત એને મહિમા તુમા ગેર યહૂદી લોકહાહાટીબી હેય, એને મર્મ ઈ હેય: ખ્રિસ્ત તુમહામાય રોહોય, જો તુમહાલ ચ્યા મહિમામાય ભાગીદાર ઓઅના આશા દેહે.

28 આમા બિજા લોકહાન ખ્રિસ્તા બારામાય આખજેહે, જું પોરમેહેરાય આમહાન પુરાં જ્ઞાન દેનહા ચ્યાકોય આમા બોદહાન ચેતાવણી દેજહે એને શિક્ષણ દેજહે, કા આમા ઈ પાકી ખાત્રી કોઅય હોકજે, જોવે ચ્યે પોરમેહેરા હામ્મે ઉબે રોય, બોદે ખ્રિસ્તામાય ચોક પાકે વિસ્વાસી રોય.

29 ઓ ઉદ્દેશ પુરો કોઅરાહાટી આંય ચ્યા સામર્થ્યા ઉપયોગ કોઇન કોઠીણ મેઅનાત કોઅતાહાંવ, જું સામર્થ્ય ખ્રિસ્ત દેહે એને જો માંચેમાય કામ કોઅહે.

2

1 મા ઇચ્છા હેય કા તુમા જાંઆય લા, કા તુમહે એને જ્યે લાવદિક્રિયા શેહેરામાય હેય, એને ચ્યા બોદહાહાટી જ્યાહાન માયે નાંય દેખ્યહે આંય કોલાં કોઠીણ મેહનાત કોઅતાહાંવ.

2 આંય યાહાટી કોઅતાહાંવ, કા ચ્યાહા બોરહો પાકો ઓઓય જાય, યોક-બીજાઆરે પ્રેમામાય રોય, એને આંય ઈ બી વિચારતાહાવ કા ચ્યાહાન પુરો બોરહો ઓએ કા, ચ્યાહાય પોરમેહેરા મર્માલ જાય લેદાહા જો પોતે ખ્રિસ્ત હેય.

3 કાહાકા તો તોજ હેય, જો પોરમેહેરા બુદ્ધિ એને જ્ઞાન વળાખ કોઆડેહે, જેથી ચ્યા ખોજાના હારકા હેય જું દુબાડી થોવલાં આતા. કેવળ ખ્રિસ્તજ ચ્યાલ જાંઅહે એને તો ચ્યાલ બોદા લોકહાન દેખાડેહે.

4 આંય તુમહાન યાહાટી આખતાહાવ, કા કાદો તુમહાન જુઠા શિક્ષણાકોય છેતરે નાંય.

5 કાહાકા આંય તુમહેઆરે નાંય હેતાંવ, તેરુંબી તુમહે બારામાય વિચાર કોઅતો રોતહાવ, એને આંય ઈ જાઇન ખુશ ઓઅતાહાવ કા તુમહાય જેહેકેન જીવા જોજે તેહેકેન તુમા જીવતેહે એને ખ્રિસ્તાવોય તુમહે બોરહો પાકો હેય.

ખ્રિસ્તામાય જીવના ભરપુરી

6 તુમહાય ઈસુ ખ્રિસ્તાલ પ્રભુ રુપામાય માની લેદલો હેય, યાહાટી ચ્યાઆરે જોડાયને જીવન જીવા.

7 એને ચ્યામાય ઉંડે ઉતતે જાં, એને વોદતે જાં, એને જેહેકેન તુમહાન હિકાડયાહા તેહેકેન બોરહો કોઅનામાય મજબુત બોનતે જાં, એને વોદારી ને વોદારી ધન્યવાદ કોઅતે રા.

8 હાયવીન રા, કાદાં તુમહાન નોકામી એને બેકાર વાતહેકોય છેતરી નાંય દેય, જ્યો માઅહા રીતીરીવાજાહા પરમાણે એને દુનિયા શિક્ષણા પરમાણે હેય બાકી ખ્રિસ્તા શિક્ષણા હારકા નાંય હેય.

9 યાહાટી છેતરાય મા જાહા, કાહાકા જોવે ખ્રિસ્ત માઅહું બોન્યો, તોવેબી તો પુરીરીતે પોરમેહેર આતો.

10 એને તો બોદા સામથ્યા એને ઓદિકારાકોય પ્રધાન હેય યાહાટી જો તુમા ખ્રિસ્તામાય હેય, તે તુમહાન કોઅહીજ વસ્તુ કમી નાંય હેય, કાહાકા તો બોદા ઓદિકારા એને આત્મિક જીવહા પ્રભુ હેય.

11 જોવે તુમહાય ખ્રિસ્તાવોય બોરહો કોઅયો, તોવે તુમહે સુન્નત માઅહાકોય નાંય કોઅલા ગીયા, બાકી તી સુન્નત ખ્રિસ્તા લીદે જાઈ જ્યાકોય તુમહે પાપી સ્વભાવાલ દુઉ કોઅયો.

12 કાહાકા જોવે તુમહાય બાપતિસ્મા લેદા તોવે ખ્રિસ્તા હારકા ડાટાય ગીયા એને ખ્રિસ્તા હારકાજ તુમહાન જીવતા કોઅયા, ઈ એહેકેન યાહાટી ઓઅયા કાહાકા તુમહાય બોરહો કોઅયો કા પોરમેહેરાય આ સામર્થ્યકોય, ખ્રિસ્તાલ મોઅલા માઅને પાછો જીવતો કોઅયો.

13 એને જોવે તુમા તુમહે પાપ એને સુન્નત હારકા મોઅલા આતા, તોવે પોરમેહેરાય ખ્રિસ્તાઆરે જીવતા કોઅયા એને આપહે બોદા પાપ માફ કોઅયા.

14 એને પોરમેહેરાય આપહે પાપ લોખલાં ચોપડીમાઅને ખોડી ટાક્યા, જીં વિદી નિયમાહા લીદે આપે વિરુદ્ધ આતા, જોવે ખ્રિસ્ત હુળીખાંબાવોય ચોડયો તોવે ચ્યે તી લોખાણ પુરીરીતે ફાડી દેના.

15 એને ચ્યાય રાજ્ય એને ઓદિકારા શક્તીહીલ આરવી દેના, એને દુનિયા નોજરેમાય ચ્યાહાન શરમિંદા કોઅયા એને હુળીખાંબા વિજયા સફર માય ચ્યાહાન કૈદાહા હારકા ફેરવ્યા.

16 યાહાટી આમી કાદાલ ઓ ઓદિકાર નાંય હેય, કા ખાઅના-પિઅના, સણ, આમાસ, કા આરામા દિહયા બારામાય તુમહાવોય દોષ થોવે.

17 ચ્યા બોદા નિયમ કેવળ ચોક ઓઅનારી વાતહે છાવાડી હારકા હેય, બાકી ખ્રિસ્ત તોજ મુળ વસ્તુ હેય.

18 કાદોબી, જુઠી નમ્રતા દેખાડીન એને હોરગા દૂતહા ભક્તિ કોઆડીન તુમહાન ઈનામાપાઅને દુઉ નાંય કોઅય દેય, ઓહડા લોક ચ્યાહાન દેખાનારા હોપનામાય લાગી રોતાહા, એને દુનિયા નોજરેકોય વિચાર કોઇન ઘમંડ કોઅતાહા.

19 ચ્યાય ખ્રિસ્તાવોય બોરહો કોઅના બંદ કોય દેનલા હેય, જો શરીરા ટોલપી હેય, જેહેકેન ટોલપી શરીરા માર્ગદર્શન કોઅહે, તેહેકેન ખ્રિસ્ત ચ્યા બોદા લોકહા માર્ગદર્શન કોઅહે; કા ચ્યે એકતામાય એને બેગે રોય, જેહેકેન શરીરા હાંદા એને નહયો શરીરાલ ચોખઠા રાખતેહે; એને ઈ જેહેકેન પોરમેહેરા ઇચ્છા હેય તેહેકેન વોદહે.

ખ્રિસ્તાઆરે જીવના એને મોઅના

20 કાહાકા તુમહે પાપી સ્વભાવ ખ્રિસ્તાઆરે મોઅઇ ગીઅલો હેય, યાહાટી આમી તુમહાન યા દુનિયા રીતિરિવાજ પાળના ગોરાજ નાંય હેય, તે પાછે તુમા કાહા આમીબી યા રીતિરિવાજ પાળતાહા, જેહેકેન તુમા આમીબી દુનિયા તાબામાંય હેય?

21 કા ઈ નાંય આથાલના, ઈ નાંય ખાઅના, યાલ આથ લાવના નાંય.

22 યા બોદા રીતિરિવાજ કાય કામા નાંય હેય, કાહાકા યા માઅહા બોનાડલા નિયમ એને દુનિયા શિક્ષણ હેય.

23 ઓહડા લાગહે જેહેકોય યા નિયમ યોક જ્ઞાનનો વાટ આપહે, એટલે પોતેજ પોરમેહેરાએછે બોળ-જોબરીકોય સમર્પિત કોઅનાથી, જુઠી નમ્રતા ભક્તિ, કોય એને આપહે શરીરાકોય કોઠાણ વ્યવહાર કોઅનાથી, બાકી આસલીમાય યા નિયમ શરીરા ઇચ્છાલ કાબુ કોઅનામાય મોદાત નાંય કોએ.

3

પવિત્ર જીવના નિયમ

1 જોવે પોરમેહેરાય ખ્રિસ્તાલ મોઅલા માઅને પાછો જીવતો કોઅયો, તે પોરમેહેરાય તુમહાનબી મોઅલા માઅને જીવતા કોઅલા હેય, તે આ ઇચ્છા રાખા જી હોરગામાય પોરમેહેરાપાય તુમહેહાટી હેય, જાં ખ્રિસ્ત પોરમેહેરાપાય બોદહા કોઅતા સન્માના જાગાવોય બોઠલો હેય.

2 દોરતીવોઅને વસ્તુહુ બારામાય નાંય બાકી ઉચે હોરગામાઅને વસ્તુહુ બારામાય કાયમ વિચાર કોઅતે રા.

3 કાહાકા તુમા પાપી સ્વભાવાહાટી મોઅઇ ગીઅલે હેય એને તુમહે જીવન ખ્રિસ્તાઆરે પોરમેહેરામાય ગુપ્ત હેય.

4 જોવે ખ્રિસ્ત જો આમહે જીવન હેય તો પાછો યી, તોવે તુમાબી આઆરે યાહા એને આ મહિમામાય સહભાગી ઓઅય જાહા.

5 યાહાટી આ ખારાબ કામહાલ કોઅના છોડી દા જ્યે તુમહે પાપી સ્વભાવાનુસાર હેય, એટલે વ્યભિચાર, અશુદ્ધતા, ખારાબ વાસના, ખારાબ ઇચ્છા એને લોબ જી મુર્તિપુજા હારકા હેય.

6 કાહાકા લોક ઓહડે ખારાબ કામ કોઅતેહે યાહાટી પોરમેહેર ચ્યાહાન સજા દેહે.

7 યોક સમય તુમાબી આપહે જીવનાલ યે ખારાબીમાય વીતાવતા આતા ચ્યાહાઆરે તુમા રોતા આતા.

8 બાકી આમી તુમા રોગ કોઅના, ખિજવાય જાઅના, નિંદા કોઅના, એને ગાળી દેઅના, ઈ બોદા બંદ કોઅય દા.

9 એને બીજહાન છેતારના નાંય, કાહાકા તુમહાય તુમહે પાપી સ્વભાવાલ એને બોદા ખારાબ કામહાલ છોડી દેનલા હેય.

10 આમી તુમા નોવે માઅહે બોની ગીઅલે હેય, પોરમેહેર, ચાલ બોનાડનારો આજુ વોદારી ચ્યા રુપામાય બોનાવી રિઅલો હેય, કા ચ્યા બારામાય પુરાં જ્ઞાન દેય હોકે.

11 યા લીદે, નાંય તે યુનાની લોક, નાંય યહૂદી, નાંય સુન્નત કોઅલા, નાંય ગેર યહૂદી, નાંય જંગલી, નાંય પારદેશી, નાંય ગુલામ, નાંય દોણી, યાહા વોચમાય કાયજ ભેદભાવ નાંય હેય, કેવળ બોદાંજ ખ્રિસ્ત હેય એને તો બોદાહામાય હેય.

ખ્રિસ્તી જીવન

12 યાહાટી જોવે પોરમેહેરાય તુમહાન ચ્યા પવિત્ર એને પ્રિય લોક ઓઅરાહાટી પોસંદ કોઅલા હેય, તે દયાળુ, ભલા કોઅનારા, દિન, નમ્ર એને સહન કોઅનારા બોના.

13 એને જ્યા કાદા દોષ ઓઅરી તે તુમા ચોકા બીજહાન સહન કોય લા, એને ચોકાબીજા ગુના માફ કોઅય દા, જેહેકેન પ્રભુય તુમહે ગુના માફ કોઅયાહાં, તેહેકેન તુમાબી કોઆ.

14 એને બોદહા કોઅતી મોઠી વાત ઈ હેય, કા ચોકા-બિજાવોય પ્રેમ કોઆ એહેકોય કોઇન, તુમા પુરી રીતી થી એકતામાય ઓઅય જાં.

15 તી શાંતી જી ખ્રિસ્ત દેહે, ચ્યાલ તુમહે રુદ્યામાય રાજ કોઅરા દા, કાહાકા તુમા બોદા ચોકુજ શરીરા અવયવ હેય એને યાહાટી તુમહાન ચોકા બિજા આરે શાંતિથી રાંહાટી હાદલા હેય, એને તુમા ધન્યવાદ કોઅતે રા.

16 ખ્રિસ્તા વચના બારામાય વોદારી ને વોદારી વિચાર કોઅતે રા, એને પુરાં જ્ઞાનાકોય ચોકા-બિજાલ હિકાડાં એને સલહો દા, એને તુમહે

મોનામાય પોરમેહેરાલ ધન્યવાદ દેયને ભજન એને સ્તુતિગીતે એને આત્મિક ગીતે આપતે રિયા.

17 તુમા જી કાય બોલા કા કોઆ, તી બોદા પ્રભુ ઈસુવા નાંવ લેઈને કોઆ એને પ્રભુ ઈસુથી પોરમેહેર આબા ધન્યવાદ કોઆ.

ખ્રિસ્તી પરિવારહાહાટી નિયમ

18 ઓ થેઅયેહેય, તુમા તુમહે માટડાહા આધીન રા, કાહાકા પ્રભુ લોકહાન એહેકેન કોઅના ઠીક હેય.

19 ઓ માટડાહાંય, તુમહે થેઅયેહેવોય પ્રેમ કોઆ, અ્યેહેઆરે ઓદરાય મા કોઅહા.

20 ઓ પાહાહાય, બોદી વાત્યેહેમાય તુમહે આયહે આબહા આખલ્યા માના, કાહાકા ઈજ પ્રભુલ ગોમહે.

21 ઓ આબહાય, તુમા તુમહે પોહાહાલ ખિજવાડી મા લાહા, નાંય તે પોહેં નિરાશ બોની જાય.

22 ઓ ગુલામાહાય, દુનિયામાય જ્યા તુમહે દોણી હેય, અ્યાહા બોદો વાતો માના, માઅહાન ખુશ કોઅનારા હારકા દેખાડાહાટી નાંય, બાકી ઈમાનદારીકોય એને પ્રભુલ આદર દેયને કામ કોઆ.

23 એને જી કામ કોઆ, તી હાઅ્યાં મોના કોઈન કોઆ, ઈ હોમજીન કા માઅહાહાટી નાંય બાકી પ્રભુહાટી કામ કોઅતાહા.

24 કાહાકા તુમા જાંઅતાહા કા પ્રભુ તુમહાન વારસાયે બોદલો દેઅરી, તુમા તે પ્રભુ ખ્રિસ્તા સેવા કોઅતાહા.

25 કાહાકા જી કાદાં ખારાબ કામ કોઅહે, અ્યા ખારાબ કામા બોદલે પોરમેહેર અ્યાલ ડોંડ દેઅરી, કાહાકા પોરમેહેર કાદા પક્ષપાત નાંય કોઅે.

4

ખ્રિસ્તા સદા મોયા

1 ઓ દોણહાય, તુમહે ચાકારાહા આરે પક્ષપાત વોગર એને ચોક હારકો વ્યવહાર કોઆ, ઈ હોમજીન કા હોરગામાય તુમહે બી ચોક દોણી હેય.

2 કાયામ પ્રાર્થના કોઅતે રા, જોવે તુમા પ્રાર્થના કોઅતેહે તોવે જાગતા રા, એને કાયામ પોરમેહેરા ધન્યવાદ કોઆ.

૩ એને આમહેહાટી બી પ્રાર્થના કોઆ, કા પોરમેહેર આમહાન વચન પ્રચાર કોઅરાહાટી મોકો દેય, એને આમા ખ્રિસ્તા તો ભેદ આખી હોકજે, જ્યા લીદે કૈદી હેતાંવ.

૪ એને યાહાટી પ્રાર્થના કોઆ કા આંચ ખ્રિસ્તા ભેદ સાફ રીતીકોય એને ખુલ્લી રીતેકોય પ્રચાર કોઅય હોકુ.

૫ અવિસ્વાસ્યાહા આરે વાત કોઅરાહાટી મિળનારા બોદા મોકા હારી રીતીકોય ઉપયોગ કોઆ, એને ચ્યાહા આરે બુદ્ધિકોય વ્યવહાર કોઆ.

૬ તુમા ચ્યાહા આરે સાદા નમ્રતાકોય વાત કોઆ, એને ઓહડયો વાતો કોઆ જ્યો મન ગમત્યો રોય જ્યેથી તુમહાન બોદા માઅહાન હારે રીતેકોય જવાબ દેયના યેય જાય.

છેલ્લી સલામ

૭ પ્રિય વિસ્વાસી બાહા એને બોરહાવાળા સેવક તુખિકુસ, પ્રભુમાંય જો મા હાંગાત્યો સેવક હેય, મા બારામાય બોધો વાતો તુમહાન આખી દેઅરી.

૮ ચ્યાલ માયે યાહાટી તુમહેપાય દોવાડયો કા, તુમહાન માલુમ ઓએ કા આમા કેહેકેન હેજે, એને તો તુમહાન મા બોરહામાય મજબુત કોઅય હોકે.

૯ એને ચ્યાઆરે ઉનેસિમુસાલ બી દોવાડજેહે, જો વિશ્વાસયોગ્ય એને પ્રિય વિસ્વાસી બાહા એને તુમહે ગાવામાઅને હેય, ચ્યા તુમહાન આમહે બારામાય બોધો વાતો આખી.

૧૦ અરિસ્તર્પુસ મા આરે કૈદી હેય, એને માર્ક જો બારનાબાસા બાહા લાગહે, સલામ આખહે, આંચ જાંઅતાહાંવ કા તુમહાન પેલ્લાજ માર્કા બારામાય આખ્યાહા, કા તો જોવે તુમહેપાય યેય તે ચ્યા હારેકોય આવકાર કોઅજા.

૧૧ એને ઈસુ જ્યાલ લોક યુસ્તસ આખતેહે, તુમહાન સલામ આખહે, સુન્નત ઓઅલા યહૂદી વિસ્વાસ્યાહા માઅને કેવળ યા તીન માટડા હેય જ્યા પોરમેહેરા રાજ્યાહાટી કામ કોઅનારા હાંગાત્યો સેવક હેય, એને યાહાકોય માન બોજ દિલાસો મિળલો હેય.

૧૨ ઇપફ્રાસ જો તુમહે ગાવામાઅને એને ખ્રિસ્ત ઈસુ સેવક હેય, તુમહાન સલામ આખહે. તો તુમહેહાટી લાગણી થી પ્રાર્થના કોઅહે,

કા તુમા બોદી વાતહેમાય પોરમેહેરા ઇચ્છા પુરીરીતે પુરી કોઅરાહાટી મજબુત બોની રોય.

13 આંય ચ્યા સાક્ષી હેતાંવ, તો તે તુમહેહાટી એને લાવદિકિયા એને હિયરાપોલીસ શેહેરામાય રોનારા લોકહાહાટી બોજ મેઅનાત કોઅહે.

14 પ્રિય ડાક્ટાર લુકા એને દેમાસ તુમહાન સલામ આખતાહા.

15 લાવદિકિયા શેહેરામાય રોનારા વિસ્વાસ્યાહાન સલામ એને નુમફાસ એને ચ્યે ગોઆ બેગી ઓઅનારી મંડળીલ સલામ આખજે.

16 એને જોવે ઈ પત્ર તુમહે મંડળીમાય વાયલા જાય, તોવે એહેકેન કોઅજા કા લાવદિકિયા શેહેરા મંડળીમાય બી વાયાહાટી દેજા, એને તી લાવદિકિયા મંડળી માઅને યેનલા પત્ર ચ્યાલ તુમાબી વાયજા.

17 એને અરખિધુસાલ આખજા, કા જીં સેવા પ્રભુમાંય તુલ દેનલી હેય તીલ હાયવીન પુરી કોઅજે.

18 આંય પાઉલ, તુમહાન સલામ આખાહાટી યા પત્રામાય આંય મા આથાકોય લોખી રિઅલો હેય, એને યાદ કોઅજા કા આંય કૈદી હેતાંવ, એને માંહાટી પ્રાર્થના કોઅજા, એને તુમહેવોય પોરમેહેરા સદા મોયા ઓઅતી રોય. આમેન.

गामीत नोवो इरात
Bible in Gamit language of India

copyright © 2022 Beyond Translation

Language: (Gamit)

Contributor: Wycliffe USA

Read and download Bible and several other Christian materials in various formats : www.freebiblesindia.in

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-02

PDF generated using Haiola and XeLaTeX on 2 May 2025 from source files dated 2 May 2025

4883a606-3c54-5975-b41a-ca7f8faf825d